



防禦第一莊－大茅埔

東勢个大茅埔莊，係因致兩百外年前廣東大埔个張寧壽，來這位開莊打林，看著這荒埔生歸大片茅，正安這名。

該當時，俾番界个大茅埔輒輒會有原住民弄弄慫慫來作躁，墾民日時頭開山打林也驚驚險險，驚玄玄風對草埔肚竄出來个番刀，暗晡頭愛歇睏又心寒膽顫，驚目睡覺分人出剿，歸日茫心青驚、毋得安生。

為著愛對付這兜原住民，厥等斯在莊肚設隘門、隘寮同巡邏个隘丁，莊頭外過摟一條又深又闊个環莊圳溝，四圍還種當多笏竹。莊頭對中有一條彎彎幹幹个大路，兩片脣五條連通个巷路也扭扭糾糾，係為著相戰時好隱身；巷路肚有連峨接棟个伙房屋，對外个牆還留有銃空，隨時使得對付敵人。

莊肚个泰興宮係莊民个信仰中心，主祀三山國王；也因致客人相信山項有龍神守護龍脈，起廟个時隆重、虔誠用「請龍」、「牽龍」同「安龍」个科儀將山龍神請到泰興宮安座，導引天地山川个靈氣來廟項鎮守，保護地方；莊頭東、西、南、北各有將寮，奉祀三角令旗个將爺，來顧守四向角頭、庇佑莊民平安順勢。

因致有建築同精神个防禦，大茅埔莊民耐過開墾初期个艱辛同族群械鬥个危險。大茅埔莊後背有龍神、面前係大甲河，俾山面水好地理，莊民對山壁鑿空作穿龍圳引水，來做民生用水、農作灌溉，這圳生養大茅埔人百外年，這下打早還使得看著歸陣婦人家跼在圳溝脣洗衫褲呢！

九二一大地動，半夜地牛翻身，大茅埔莊个老屋轉轉撇，守護莊民百外年个設計破壞淨淨，人也有傷亡。好得，客人堅耐硬程，慢慢，原旦轉撇个伙房屋企核一間一間新衝衝个樓屋，橫撇个牆頭，開出歸掖靚靚个喇叭花，既經無防禦需求个彎幹巷路為著利便擲直咧，護莊圳溝也變做環莊道路，大茅埔莊改頭換面變後生咧！這幾年，當多大茅埔出外个後生轉到莊項，厥等開始研究自家莊頭个文化歷史、風俗信仰，做社區營造、尋出大茅埔莊个特色，運用各種媒體報導行銷大茅埔，想愛同自家个家鄉紹介分過較多个人；厥等煞猛認真為著大茅埔莊，斯像老頭擺拚命保護莊頭个祖先。

帶核山川靈氣个龍神、泰興宮威武个三山國王，同掌管四向角頭个將爺，百外年來看核大茅埔莊起起落落，共款堅心守護大茅埔，厥等係莊民誠心敬愛个保護神，也係盡好个心靈防禦。

作者：徐姿華

☆詞彙學習☆

- | | |
|--|---|
| 【弄弄慫慫】nung` nung` sung` sung`：偷偷摸摸、鬼鬼祟祟。 | 【龍神】liung` shin`：掌管天地山川靈氣的山龍神。 |
| 【作躁】zog` cau`：受鬼神擾亂使人心神不寧。在此引申為作怪騷擾。 | 【將寮】ziong` liau`：供奉稱作將爺的三角令旗磚砌或水泥小祠，將爺即是將軍。 |
| 【目睡覺】mug` shoi` gau`：睡夢中。 | 【穿龍圳】chon+ liung` zhun`：開鑿山壁引水的圳。 |
| 【出剿】chud` sau`：出草，原住民砍人頭。 | |



本著作以創用CC「姓名標示-非商業性-禁止改作」4.0國際授權條款釋出。
詳細授權條款，請至 <http://creativecommons.org/licenses/by-nc-nd/4.0/>。
資料來源：教育部電子報「閱讀趣懂閩客語」專欄 <http://epaper.edu.tw>。